

ქართული ეკონომიკური ლიბერალიზაციის დიდი შენახანი

ეკონომიკური პროფილით გამოცემულ ხარისხიან და ღირებულ სახელმძღვანელოთა არცთუ ისე დიდ რიცხვს კიდევ ერთი ფუნდამენტური ნაშრომი შეემატა. ეს არის ეკონომიკის მეცნიერებათა დოქტორის, საქართველოს ტექნიკური უნივერსიტეტის სრული პროფესორის, ქალბატონ **ლამარა ქოქიაურის** მიერ ახლახან გამოცემული სახელმძღვანელო – „**საინვესტიციო საქმე**“.

გრძელვადიან პერსპექტივაში საწარმოთა ეფექტიან საქმიანობას, მათი განვითარების მაღალი ტემპების უზრუნველყოფას და კონკურენტუნარიანობის ამაღლებას საბაზრო ეკონომიკაზე გადასვლის პირობებში მნიშვნელოვანწილად განსაზღვრავს მათი საინვესტიციო აქტივობის დონე. საინვესტიციო საქმიანობის დიაპაზონი, საწარმოს საინვესტიციო საქმიანობის განხორციელებასთან დაკავშირებულ საკითხთა კომპლექსი ღრმა, თეორიულ ცოდნასა და მმართველურ გადაწყვეტილებათა მიღების პრაქტიკული ჩვევებს მოითხოვს ისეთ სფეროებში, როგორიცაა საინვესტიციო სტრატეგიის დასაბუთება, მისი ეფექტიანი მიმართულებებისა და ფორმების შერჩევა, რეალური ინვესტირების მიზანმიმართული პროგრამის შემუშავება და ფინანსური ინვესტიციების დაბალანსებული პორტფელის ფორმირება. საკითხთა ეს კომპლექსი ცოდნის სპეციალური მიმართულების საგანია, რომელმაც „საინვესტიციო საქმის“ სახელწოდება მიიღო. საწარმოს ამ სახის ფუნქციური მართვით გადასაწყვეტ საკითხთა წრე საკმაოდ ფართოა, რადგან ინვესტიციური გადაწყვეტილებები განუყოფლად უკავშირდება საწარმოს ყველა ძირითადი სახის საქმიანობას და მისი სასიცოცხლო ციკლის ყველა სტადიას, აყალიბებს მის პერსპექტიულ ორგანიზაციულ სტრუქტურას და საინვესტიციო კულტურას.

ფინანსური და საინვესტიციო მენეჯმენტის ცალკეულ ასპექტებზე ბოლო წლებში საკმაოდ რაოდენობით გამოჩნდა ცნობილი საზღვარგარეთელი ეკონომისტების მაღალი დონის შრომათა თარგმანები. საკმარისია აღინიშნოს, რომ მათგან ცალკეული ნაშრომების ავტორები – გ. მარკოვიცი, მ. მილერი, ფ. მოდილიანი, პ. სამუელსონი, უ. შარფი, დ. ტობინი, რ. სოლოუ და სხვები – ნობელის პრემიით არიან დაჯილდოებული. მაგრამ საზღვარგარეთ საინვესტიციო მენეჯ-

მენტი უპირატესად ფასიანი ქაღალდების პორტფელის მართვის სფეროს უკავშირდება, რადგან განვითარებულ საბაზრო გარემოში ინვესტირება ძირითადად საფონდო ბაზრის ინსტრუმენტებისა და მექანიზმების მეშვეობით ხორციელდება. სამწუხაროდ, საფონდო ბაზრის განვითარების დაბალი დონე, მისი ინსტრუმენტების შეზღუდული წრე, ბაზრის დინამიკის საიმედო ინდიკატორების უქონლობა და სხვა ფაქტორები ჯერ არ იძლევა ჩვენს პირობებში საინვესტიციო მენეჯმენტის საზღვარგარეთული გამოცდილების საკმარისი სისრულითა და ეფექტიანობით გამოყენების შესაძლებლობას.

დღეისათვის ხელმისაწვდომი გამოცემული ნაშრომები საინვესტიციო მენეჯმენტის შესახებ ძირითადად მოიცავენ საწარმოების ინვესტიციური მართვის მხოლოდ ცალკეულ ასპექტებს და პრაქტიკულად არ განიხილავენ იმ საკითხების კომპლექსს, რომლებიც დაკავშირებულია ინვესტიციური რესურსების ფორმირებასთან, საინვესტიციო რისკების მართვასთან, საინვესტიციო ბაზრის კონიუნქტურის პროგნოზირებასთან და საინვესტიციო გარემოს სხვა ფაქტორებთან. ამ ნაშრომთა ძირითადი წრე მხოლოდ იმეორებს დასავლურ მიდგომებს და მეთოდებს გარდამავალ ეკონომიკასთან საჭირო კავშირების გარეშე, მოკლებულია საჭირო საკვლევ ბაზას და თითქმის არ ასახავს ცალკეული საწარმოების მიერ დაგროვილ საინვესტიციო საქმიანობის რეალურ პრაქტიკულ გამოცდილებას. საწარმოს ხელსაყრელი ეკონომიკური კლიმატის ფორმირება, საინვესტიციო ბაზრის სეგმენტაციის გაღრმავება, საინვესტიციო საქონლისა და ტექნოლოგიების წრის გაფართოვება მენეჯმენტისათვის წარმოადგენს საქმიანობის ფართო არეალს ეფექტიანი, სტრატეგიული და ოპერატიული საინვესტიციო გადაწყვეტილებათა მიღებისათვის. საინვესტიციო საქმიანობის პრაქტიკული გამოყენება შესაძლებელს ხდის საწარმოთა ეკონომიკური განვითარების ახალ ხარისხზე გადასვლას საბაზრო პირობებში.

ინვესტიცია არის მიმდინარე მოხმარებაზე უარის თქმა მომავალში შედარებით მეტი შემოსავლის შესაძლო მიღების სანაცვლოდ, რომელიც, როგორც მოსალოდნელია, უფრო მეტ ჯამურ (ე.ი. მიმდინარე და მომავალ) მოხმარებას უზრუნველყოფს. ინვესტიცია მეტად რთუ-

ლი ცნებაა, რომელსაც არაერთგვაროვნად განმარტავენ და, პრინციპში, ძნელად ხერხდება მისი პრაქტიკულ სიბრტყეში განთავსება (ცხადია, იგულისხმება, რომ საუბარია რაციონალურ, დასაბუთებულ ინვესტიციაზე და არა სახსრების პრიმიტიულ დაბანდებაზე იმ იმედით, რომ აუცილებლად გაამართლებს და დაბანდება ერთიასად დაბრუნდება).

საყოველთაოდაა მიღებული ის ფაქტი, რომ ნებისმიერი ბიზნესის, ნებისმიერი სოციალურ-ეკონომიკური სისტემის სიცოცხლისუნარიანობა და აღმავლობა რაციონალურ საინვესტიციო პოლიტიკაზეა მნიშვნელოვანწილად დამოკიდებული. ეს პოლიტიკა ხარჯიანი და სარისკოა. სხვა სიტყვებით რომ ვთქვათ, ჯერ ერთი, ინვესტიციები არ არსებობს ხარჯების გარეშე – თავიდან საჭიროა სახსრების დაბანდება, ე.ი. ხარჯების გაწევა, და თუ გათვლები სწორი იყო, ხარჯები მხოლოდ მაშინ ანაზღაურდება; მეორე, შეუძლებელია ყველა იმ გარემოების წინასწარ გამოცნობა, რომელიც ინვესტორს მომავალში ელოდება, – ყოველთვის არსებობს იმის არანულოვანი ალბათობა, რომ გაღებული ინვესტიციები მთლიანად ან ნაწილობრივ დაიფარება.

საინვესტიციო საქმიანობის ეს თავისებურებები (განმარტების თანახმად, ამას ვერც ერთი ბიზნესი ვერ აუვლის გვერდს) ყველა ბიზნესმენისა და ჩვეულებრივი ადამიანისგანაც კი მოითხოვს სახსრების დაბანდების, თუნდაც ელემენტარული უნარ-ჩვევების, აუცილებელ ფლობას. ცხადია, ეს უნარ-ჩვევები განსხვავებული აქვს იმ უფულო სტუდენტს, რომელიც ცდილობს მოიფიქროს, თუ როგორ შეუძლია მოაგროვოს ბოლო გამოშვების კომპიუტერის თუ მანქანის ფული; იმ რიგით მასწავლებელს, რომელიც ოცნებობს ფული მოაგროვოს და კანარის კუნძულებზე გაემგზავროს სტუდენტებთან მუშაობაში დახარჯული ენერგიის აღსადგენად, იმ დამწყებ ბიზნესმენს, რომელსაც ამბიციები ხელს უშლის ადეკვატურად დაუკავშიროს თავისი სანუკვარი სურვილები და შესაძლებლობები კონკურენტული გარემოს მკაცრსა და უღმობელ რეალობას, გამოცდილ ფინანსისტ-სპეკულანტს, რომელიც დათვით გრძნობს თავს ქვირითის დასაყრდელ მიმავალი თევზით სავსე მდინარეში.

ინვესტიცია მუდამ არის ცვლილება, რუტინული დინებისგან გააზრებულად გადახვევა, მომავლის დანახვის მცდელობა. საინვესტიციო საქმიანობა, გარკვეული აზრით, იძულებითი ღონისძიებაა, რადგან წერა-კითხვის მცოდნე ნებისმიერ ბიზნესმენს, ხელმძღვანელსა თუ

მენეჯერს კარგად ესმის, რომ ინვესტიცია არის აუცილებელი რაციონალური (ცხადია, ინვესტორის სუბიექტური თვალსაზრისით) მოძრაობა, რომელიც ყოველთვის სჯობს უძრაობასა და სტატუსკვოს კონსერვაციას. მაგალითად, მიმდინარე საწარმოო სიმძლავრეები თავისი მახასიათებლებით, შესაძლოა, სრულიად აკმაყოფილებდეს მის მესაკუთრეებს, მაგრამ მხოლოდ სულმთლად ბეცი (ეკონომიკური გაგებით) და ნაკლებ წიგნიერი მათი წარმომადგენელი თუ „დაიკრეფს გულზე ხელებს“ და თვალს დახუჭავს იმაზე, რომ ეს სიმძლავრეები ყოველწამიერად ძველდება ფიზიკურადაც და მორალურადაც. პირიქით, ის სპეციალისტი, რომელიც თავისი საქმის პერსპექტიულად წარმართვას გეგმავს, მშვენივრად უღებს ალღოს იმას, რომ უცვლელობა და უძრაობა, არსებითად, ყოველთვის რეგრესის და დაქვეითების დასაწყისია.

მართლაც, როგორც ლ. ქეროლი შენიშნავს, „ადგილზე რომ დარჩე, ძალიან სწრაფად უნდა ირბინო. დაწინაურებისთვის ორჯერ უფრო სწრაფად სირბილია საჭირო“. საინვესტიციო საქმიანობა სწორედ იმის ნიშანია, რომ ხელმძღვანელი (ფირმა) იმას მაინც ცდილობს, რომ „ირბინოს“. ამ „სირბილში“ არათუ შეიძლება, არამედ აუცილებლად იქნება შეცდომები; მაგრამ ცნობილია, რომ ვინც ზის, ის არ წაიბორძიკებს, „არაფრის კეთება“ (ამ შემთხვევაში – საინვესტიციო უმოქმედობა) სულაც არაა ქცევის საუკეთესო ვარიანტი, განსაკუთრებით – ბიზნესში. შემთხვევითი არაა, რომ საინვესტიციო საქმიანობის, საინვესტიციო გარემოს თუ საინვესტიციო მიმზიდველობის შესახებ სპეციალისტები მუდამ მთელი ქვეყნის, მისი რეგიონებისა და ცალკეული ფირმების განვითარების ინტენსიფიკაციის პრობლემებისა და მეტოდების განხილვის კონტექსტში საუბრობენ.

მონოგრაფიების და სახელმძღვანელოს ციკლში შეიძლება გამოვყოთ საყურადღებო სახის ახალი, მნიშვნელოვანი თეორიული და მეთოდოლოგიური ნოვაციები, რაც განსაკუთრებით სასარგებლო და საინტერესო იქნება მკითხველთა ფართო წრისათვის – საბაკალავრო პროგრამის სტუდენტებიდან დაწყებული – პროფესიონალი ბიზნესმენებით დამთავრებული. კადნიერებაში არ ჩაგვეთვლება, თუ ვიტყვით, რომ ეს შრომა დაეხმარება მკითხველს ღრმად გაერკვეს ინვესტიციების რთული სამყაროს ლაბირინთებში (რომელსაც აგერ უკვე თითქმის სამი ათეული წელია ქალბატონი ლამარა ქოქიაური შეისწავლის) და გახდეს განათლებული სპეციალისტი.

მოკლედ წიგნის არქიტექტონიკის შესახებ: ნაშრომი მოიცავს შესავალს ქართულ და ინგლისურ ენებზე, ცამეტ განყოფილებას, 50 თავს, მოკლე დასკვნებს, კითხვებსა და დავალებებს დამოუკიდებელი მუშაობისათვის და რეკომენდებული ლიტერატურის სიას ყოველი განყოფილების ბოლოს; წიგნს დართული აქვს აგრეთვე ტესტები და ამოცანები ჩათვლებისა და გამოცდებისათვის.

წინამდებარე ნაშრომში ავტორს მოცემული აქვს ინვესტიციების თეორიული გენეზისის გადმოცემის კლასიკური სქემა, რამაც გარკვეული გავლენა იქონია საკითხების დალაგებისა და გადმოცემის თანმიმდევრობაზე.

საინვესტიციო სფეროში ავტორმა მრავალწლიანი მუშაობის შედეგად შეძლო დამუშავებინა ქართულ ეკონომიკურ მეცნიერებაში ერთ-ერთი ყველაზე საინტერესო და შეუსწავლელი სფერო – ფინანსური ინვესტიციები, ფასიანი ქაღალდები, მათი გამოშვება, მიმოქცევა; ფასიანი ქაღალდების ბაზრის კლასიკური და ფუნდამენტური ანალიზის ჩატარების აუცილებლობა, უახლოესი მეთოდები, ფუნდამენტური კორპორაციული ფასეულობები, ტექნიკური ანალიზის ამოცანები, ინსტრუმენტები და ინდიკატორები, ფიზიკისა და ელიოტის თეორიები, ბაზრის ტექნიკური ანალიზი ტრენდული სახის ტიპური ფიგურებისა და ფორმაციების მეშვეობით.

განსაკუთრებული ყურადღება აქვს დათმობილი საინვესტიციო ეფექტიანი პორტფელის შერჩევის ფორმირებისა და საზღვრების განსაზღვრის საკითხებს. დაინტერესებულ მკითხველთა ფართო წრეს და განსაკუთრებით სტუდენტ-ახალგაზრდობას ასევე პირველად სთავაზობს ავტორი საინვესტიციო პორტფელის შემოსავლიანობისა და რისკის გაზომვის, მათ შორის დამოკიდებულების, ოპტიმალური პორტფელის შერჩევის მარკოვიცისა და შარპის მოდელებს; ფინანსური სახსრების ფასწარმოქმნისა და საინვესტიციო გადაწყვეტილებების შეფასების პრობლემების ამოსავალ დებულებებს – CAPM-ის მოდელის და საარბიტრაჟო თეორიას. ცალკეა განხილული საინვესტიციო რისკების შეფასება, საპროექტო დაფინანსების რისკები, მათი რეგულირების პროცესი და შემცირების ღონისძიებათა შემუშავება, რისკების იმიტაციური მოდელირება მონტე-კარლის მეთოდით და ა.შ.

შრომაში ახლებურად, ყოვლისმომცველად შეეცადა ავტორი გადმოეცა ინვესტიციები ინტელექტუალურ კაპიტალში, მისი მართვის საბაზისო-თეორიული წინაპირობები და პრინციპები;

დაამუშავა ინტელექტუალური კაპიტალის, ინტელექტუალური პოტენციალის, ინტელექტუალური საკუთრების, მთლიანად ინტელექტუალური აქტივების, ინტელექტუალურ-ინოვაციური საქმიანობის საკვანძო პრობლემები; განსაკუთრებული ყურადღებაა გამახვილებული ინტელექტუალური კაპიტალის მართვის მექანიზმზე.

გარდა ზემოთ ჩამოთვლილი სიახლეებისა, სახელმძღვანელოში გაშუქებულია საინვესტიციო სფეროს ისეთი მნიშვნელოვანი საკითხები, როგორიცაა საინვესტიციო პოლიტიკა, სტრატეგია, საინვესტიციო მენეჯმენტი და მისი მეთოდური ინსტრუმენტარიები, საინვესტიციო ბიუჯეტირება.

ავტორმა შეძლო აღნიშნულ წიგნში გადაეჭრა შემდეგი ამოცანები:

- ინვესტიციების და ინვესტიციური საქმიანობის ეკონომიკური შინაარსისა და მნიშვნელობის გახსნა;
- ინვესტიციური პროცესის დამახასიათებელი ძირითადი ცნებების განხილვა; ქვეყნის ეკონომიკური ზრდის უზრუნველყოფაში ინვესტიციების ადგილი და როლის განხილვა;
- ინვესტიციური საქონლის ბაზრის ფუნქციონირების მეთოდოლოგიური საფუძვლების შესწავლა და მისი კონიუნქტურის პროგნოზირება ტრანზიტიული ეკონომიკის პირობებში;
- სახელმწიფოს ფინანსური და ფულად-საკრედიტო პოლიტიკის სამეურნეო სუბიექტების საინვესტიციო აქტივობაზე გავლენის ხარისხის და მისი აქტივიზაციის გზების განსაზღვრა;
- ქვეყნის პრაქტიკაში საინვესტიციო პროექტების ეფექტიანობის რაოდენობრივი და ხარისხობრივი გაზომვის მიღებული მეთოდების კრიტიკული შეფასება.
- ეკონომიკის რეალურ სექტორში ინვესტიციების გრძელვადიანი დაფინანსების არსებული მეთოდებისა და წყაროების გაანალიზება და მათი ოპტიმიზაციის გზების განსაზღვრა;
- ფინანსური ინვესტიციების, ფინანსური ბაზრების, ფინანსური ინსტიტუტებისა და ინსტრუმენტების, ინვესტიციის ბაზრის არსის, ძირითადი სახეების, ფუნქციების დასაბუთება და მათი განვითარების თანამედროვე ტენდენციების განხილვა;
- ფასიანი ქაღალდების, მათი ოპერაციებისა და ემისიის წესების, ფასიანი ქაღალდების ბაზრის ფუნქციონირების, მისი კლასიკური და ფუნდამენტური ანალიზის უახლოესი მეთოდების, ფასიანი ქაღალდების ტექნიკური ანალიზის

ამოსავალი დებულებების გაცნობა და შესწავლა;

- პორტფელური ინვესტირების თეორიის ძირითადი პოსტულატების, საინვესტიციო პორტფელის კლასიფიკაციის, ფორმირების, პორტფელური რისკების მართვის მეთოდების განსაზღვრა; მარკოვიცის, შარპის, მოდელის ამოსავალი დებულებების შესწავლა;

- ინტელექტუალური კაპიტალის მართვის საბაზისო თეორიული წინაპირობებისა და პრინციპების, მათი მართვის მეთოდოლოგიისა და მართვის მაჩვენებლების, პარამეტრებისა და აპარატის შემუშავება; მთლიანად საწარმოს ინტელექტუალური კაპიტალის არსის, ინტელექტუალური აქტივების კლასიფიკაციის გაცნობა და ორგანიზაციის ინტელექტუალურ-ინოვაციური საქმიანობის განხორციელების უწყვეტი პროცესის შესწავლა;

- საინვესტიციო პოლიტიკის ფორმირების ძირითადი პრინციპების, მისი გააქტიურების, რეგიონალური ასპექტების გაცნობა; საინვესტიციო სტრატეგიის შემუშავების პრინციპების, თანმიმდევრობის, მიზნებისა და მიმართულებების დასაბუთება და შედეგიანობის შეფასება;

- საინვესტიციო მენეჯმენტის არსის, მიზნის, ამოცანების, ფუნქციებისა და მექანიზმის არქიტექტონიკაში გარკვევა; აგრეთვე მისი ინფორმაციული უზრუნველყოფის სისტემის, საინვესტიციო დაგეგმვის, საინვესტიციო მენეჯმენტის მეთოდური ინსტრუმენტარიუმის ჩამოყალიბება;

- უცხოური კაპიტალის მოზიდვისა და გამოყენების ძირითადი პრობლემების, უცხოური ინვესტიციების ფორმებისა და სტრუქტურის ევოლუციის მნიშვნელობის, მათი მოზიდვის სტიმულირების აუცილებლობის დასაბუთება საბაზრო ეკონომიკის პირობებში;

- საინვესტიციო პროცესში საინვესტიციო ბანკების ადგილისა და როლის ფორმულირება და მათი საინვესტიციო აქტივობის გადიდების საკითხები თანამედროვე პირობებში;

- ინვესტიციური ბიუჯეტირების შინაარსის, მისი პარამეტრების გაუმჯობესების, ძირითადი ამოცანების, ბიუჯეტირების რეგლამენტირების, შედგენის პროცედურის, დამუშავების სქემის, შესრულების თანმიმდევრობისა და შეფასების ანალიზი.

ნაშრომის სტრუქტურა და შინაარსი განსაზღვრულია ეკონომიკის პროფილის უმაღლესი პროფესიული განათლების სახელმწიფო საგანმანათლებლო სტანდარტების მოთხოვნებით, რომელშიც „ინვესტიციების“ კურსი სპეციალ-

ური დისციპლინების ბლოკშია შეტანილი. წიგნში დეტალურადაა გადმოცემული სტანდარტში მითითებული ყველა თემა. გარდა ამისა, როგორც ეკონომიკაში, ისე განათლებაში მიმდინარე პროცესების გათვალისწინებით ქალბატონმა ლამარა ქოქიაურმა საჭიროდ ჩათვალა ეკონომიკური მეცნიერების საკმაოდ ახალ მიმართულებათა განხილვა. კერძოდ, საუბარია ფინანსურ ინსტრუმენტებზე, საფინანსო-საინვესტიციო სფეროს ფუნქციონირების, ინტელექტუალური ფასეულობების არსის დასაბუთებაზე, პირდაპირი უცხოური ინვესტიციების ახსნის ჰიპოთეზებზე, ფასიანი ქაღალდების ბაზრის ფუნდამენტური და ტექნიკური ანალიზის საკითხებზე და ა.შ.

წიგნში მოყვანილია უამრავი ბიბლიოგრაფიული წყარო, ამასთან, ფორმალურად ისინი ორ ჯგუფადაა დაყოფილი. პირველ ჯგუფს შეადგენს ის წყაროები, რომლებსაც მასალის გადმოცემისთვის მხოლოდ დამხმარე ხასიათი აქვს იმ აზრით, რომ მათზე მითითება ძირითად ტექსტშია მოცემული; მეორე ჯგუფში შევიდა ის წყაროები, რომლებიც საბაზო დამატებით ლიტერატურადაა რეკომენდებული. სწორედ ისინია მოყვანილი ყოველი განყოფილების ბოლოს ცალკე სიის სახით. ცხადია, ამგვარად დაყოფა აბსოლუტიზებული არ უნდა იყოს – რეკომენდებული ლიტერატურის მოყვანილი სიები მხოლოდ ავტორის სუბიექტურ აზრს ასახავს. საჭიროებისა და სურვილის შემთხვევაში მკითხველი ადვილად შეძლებს მისთვის საინტერესო სპეციალური ლიტერატურის დაწვრილებითი ჩამონათვალის შედგენას.

ასევე, აღსანიშნავია, რომ ავტორმა კომპლექსურ ნაშრომს მთლიანობაში უწოდა „საინვესტიციო საქმე“, მაგრამ თითოეული განყოფილება შეეცადა წარმოედგინა – როგორც დასრულებული სახის ნაშრომი, რომელიც სრულ წარმოდგენას შეუქმნის და ამომწურავ ინფორმაციას მიაწვდის მკითხველს ინვესტიციური საქმიანობის თითოეულ ამ მნიშვნელოვან სფეროზე.

როგორც ავტორი აღნიშნავს – „ჩვენს ქვეყანაში უკანასკნელ პერიოდამდე ფართოდ გამოიყენებოდა საუკეთესო უცხოური სახელმძღვანელოები, უკეთეს შემთხვევაში, მათი თარგმანები. ვფიქრობთ, დადგა დრო მოვამზადოთ ხარისხიანი სამამულო სახელმძღვანელოები. მით უმეტეს, უნივერსიტეტის პედაგოგიურ კორპუსს მოგვეცა ამის რეალური შესაძლებლობა – შევქმნათ საბაკალავრო და სამაგისტრო განათლების თანამედროვე მოთხოვნების შესაბამისი სახელმძღვანელოები“.

ამავე გარემოებამ გამოიწვია აღნიშნულ

დისციპლინაში სილაბუსი-პროგრამის შემუშავება, რათა სტუდენტებს გაუადვილდეთ სასურველი მასალის მოძიება, შესწავლა, შემდგომი მუშაობა.

– მართალია, შენარჩუნებულია სახელმძღვანელოების შედგენის საყოველთაოდ მიღებული სტილი, მაგრამ ზოგჯერ მაინც მოცემულ ამა თუ იმ საკვანძო საკითხზე გადმოცემულია ავტორის აზრი.

მოცემული შრომის აგების ლოგიკა და მისი ძირითადი მასალები აპრობირებულია ავტორის მიერ საინვესტიციო მენეჯმენტის სწავლების კურსის პროცესში უმაღლესი სასწავლებლების სტუდენტებისათვის. ასევე პრაქტიკული სემინარების ჩატარებისას საწარმოს ხელმძღვანელებთან და საინვესტიციო მენეჯერებთან, რიგ კომპანიებთან და ფირმებთან უშუალო თანამშრომლობის დროს.

ავტორი იმედს გამოთქვამს, რომ რეკომენდაციები, რომელიც ამ წიგნშია მოცემული, პრაქტიკულ დახმარებას აღმოუჩენს საწარმოებს საინვესტიციო საქმიანობის ეფექტიანობის ამაღლებაში და გამოყენებული იქნება საინვესტიციო მენეჯერების ახალი თაობის მომზადების საქმეში.

წინამდებარე ნაშრომი გამოდის ივანე ჯავახიშვილის სახელობის თბილისის სახელმწიფო უნივერსიტეტისა და საქართველოს ტექნიკური უნივერსიტეტის ეკონომიკური პროფილის სახელმძღვანელოების სერიით. იგი მიმართულია საუნივერსიტეტო ეკონომიკური განათლების შინაარსისა და სტრუქტურის განახლებისაკენ; რამეთუ მთლიანად უნივერსიტეტებში და კერძოდ, ივ. ჯავახიშვილის სახელობის თბილისის სახელმწიფო უნივერსიტეტის ეკონომიკისა და ბიზნესის ფაკულტეტზე და საქართველოს ტექნიკური უნივერსიტეტის ეკონომიკისა და ბიზნესის მართვის დეპარტამენტში დიდი მუშაობა ტარდება განათლების რეფორმის წარმატებით გატარებისა და ბოლონის ქვეყნებთან მიერთების პროცესის დაჩქარების მიმართულებით.

ეს პროცესი შეუქცევადია და დიდ ძალისხმევას მოითხოვს. ქალბატონი ლამარა ქოქიაურის, როგორც უმაღლესი სკოლის პედაგოგისა და მეცნიერის მისია, ჩვენი სახელოვანი სტუდენტებისათვის თანამედროვე სახელმძღვანელოების, სამეცნიერო პუბლიკაციების და დროის შესატყვისი პროგრამების შექმნა-გამოყენებაში არის შესრულებული. ერთს კიდევ დავამატებთ: ავტორის მიერ შემოთავაზებული წიგნი, სხვა ადრე გამოცემული მონოგრაფიების და სახელმძღვანელოების მსგავსად, პრობლემატიკის ყველა დასმულ კითხვაზე პასუხს ვერ გასცემს. იგი სხვაგვარად სვამს საკითხს: „ვიმედოვნებთ, სტუდენტებს, მაგისტრებს, ყველა გონიერ მკითხველს მისი გაცნობის შემდეგ დაებადება სერიოზული კითხვები, რომელთა პასუხების მოძებნა მოუწევთ სხვა მონათესავე შრომებსა და მეცნიერულ წყაროებში. მონოგრაფიების, მონოგრაფიული ხასიათის სახელმძღვანელოების, ენციკლოპედიების, ვირტუალური მასალების მუდმივი ძიება, ამ სფეროში ცოდნის შეძენის და უსასრულოდ შევსების მუდმივ პროცესშიც ვხედავთ ჩვენი, როგორც ავტორის მისიას“.

თუ რამდენად მიაღწია ავტორმა მიზანს, ამ წიგნების მომხმარებლებისათვის მოგვინდია.

დასკვნის მაგიერ: მართალია, ნებისმიერი ხასიათის, დონის ნაშრომს აქვს ნაკლოვანებები; ავტორიც აღნიშნავს „ჩვენი ნაშრომი არ იქნება დაზღვეული ნაკლოვანებებისგან. ამგვარი პრეტენზია არასოდეს გვქონია და არც გვაქვს. ყველა შენიშვნას, კონსტრუქციულ კრიტიკას, საქმიან წინადადებას, კეთილ სურვილებს დიდი ყურადღებით მოვისმენთ და გავითვალისწინებთ ჩვენს შემდგომ მუშაობაში“. მიუხედავად დიდი მცდელობისა, „საინვესტიციო საქმის“ ენციკლოპედიურ ნაშრომში ნამდვილად ვერ ვიპოვეთ არსებითი ხასიათის ნაკლოვანებები, ხოლო არაარსებითი ნაკლოვანებებისგან თავი შევიკავეთ. მით უმეტეს, რომ ჩემი ღრმა რწმენით, და ეს რეცენზიაც ამის დადასტურებად მიმაჩნია, – საქმე გვაქვს როგორც თეორიულ-მეთოდოლოგიური, ისე პრაქტიკულ-გამოყენებითი თვალსაზრისით, უაღრესად მაღალი ღირებულებების ნაშრომთან.

ბენადი იაშვილი

სტუ-ს სრული პროფესორი;

ბიზი გამსახურდია

სტუ-ს სრული პროფესორი;

ვახტანგ ღათაშვილი

ვეროპული უნივერსიტეტის რექტორი